



國家清史編纂委員會·文獻叢刊

六編

清代稿鈔本

第二九九冊

國家清史編纂委員會・文獻叢刊

六編

清代稿鈔本

第二九九册

廣東省立中山圖書館
中山大學圖書館

編

主編 桑兵
副主編 李昭醇 程煥文 劉洪輝

SPM

南方出版傳媒
廣東人民出版社

・廣州・

第二九九册目錄

京報摘鈔

.....

京報摘鈔

不分卷

光緒三十一年六月至宣統元年七月

雜鈔散件

佚名輯

鈔本

己巳中報
六月十二日
紀賠款用金始末 錄順天時報

初各國與中國議賠款還金也各國政府均有將償金作為金貨債票之意當時如英國委員以磅金價目作為債票美國欲以弗金價目作為債票日俄法德諸國皆思以自國之標準價目作為債票按其意見各以本國之金幣為標準議論紛紜莫衷一是故勢不得已即以中國銀兩價目決定賠款為四億五千萬兩當時之款照滬市磅價折算列國皆規定用金 定其價格作為金貨債票決定金銀市價時或有變動而按金價折算決無更變之事詎不期年金銀價比較大形變動前年約定還金中國大為受虧而在各國之意以條款訂立用金即不允用銀雖銀價低落不得因此而減少還金之額故每至償款用金之時中外委員輒生糾葛中國委員曰賠款約定以銀故以銀賠還無不可也列國委員曰不然賠款用金作為金貨債票明載於條約以銀償還無是理也相爭不決故中國每期所還之賠款自中國言之已足敷預定之額數而自各國言之尚不足預定之額數交涉大形棘手此問題遂自滬道迭商外部與各國使臣交涉邇來五年交涉往復磋商幾至唇舌敝卒不得決是不徒各國與中國意見不合之故各國各自意見不合之故也上月各國使臣與中國政府知其不利互相讓步議定新約然俄國使臣雷薩爾尚倡異議不肯簽印乃忽然逝世因是又復荏苒數旬前日俄署理公使已決從眾論而事始決矣按該新約決定用金中國之目的幸不能達唯各國委員所算賠金不敷之額一千二百餘萬兩者折算

為八百萬兩約減四百萬兩簽印後限十五日賠還各國稍似體恤中國也其賠款原約所定金銀價比較均不准更變將來中國應償各國之賠款額數一律作為金貨債票交付于各國且以全年應償之額分十二個月每月交還于各國其交還之金額或用金貨或用匯票或用銀貨折算金貨價格均從各國所願合同約文大要如上故五年間之交涉中國唯贏得四百萬兩其餘要目皆同原約無更變也

乙巳中報
六月十四日

論政府近日外交之手段

自來論及公法者無不曰世界之上惟強國可以言公法弱國則無望焉吾謂外交之手段亦然惟強國能使用之而弱國無望焉何則今日外交之手段固非如戰國時之蘇秦張儀能以立談之下而售其詐術也當機牙肆應之時必能使他國雖覺我之外交手段而無術以脫此範圍斯則可爲善用外交手段者矣夫欲使他國雖覺悟我之手段而無術以脫之此非挾強盛之國勢以迫於其後者必不能奏其效吾故曰外交手段亦惟強國能使用之也

至於孱弱之國見強國之用外交手段而得志也亦思步其後塵以攫利益於列強紛爭猜忌之中以抵制其侵陵之政策是無論外交手段之劣而不如人也即勝於人矣他人亦未有不覺之者即一時售其計矣終未有不悟之者既覺悟之後必憤我之肆狡獪以圖彼也將益以重其疾視之心其所索益以加奢其遇事牽掣亦日甚此在個人之交際固常見之國際交涉亦正無異於是故弱國之用外交手段如未熟練之技師而用爆藥正不可不慎也

試證之於我國昔日之外交當外人初與中國交通時其所要求於我者不問其可准與否概拒絕之其拒之之法不一或延宕之以緩其勢或偽應之以殺其怒或藉口於民之不願或陰結一國以排他國卒之使術愈多倚事愈大五十年來外交政策無一不歸失敗原其始皆自政府諸公子智自雄莫以

狡獪之手段掩飾外人而不知其害之反中於己也當咸豐時英法軍燬圓明園一役藉俄之力以講和而烏蘇里江以東之地遂失是為東三省撤其藩籬之始迨乙未馬關之約成利用俄法德三國之干預得收還遼東半島當是時亦嘗自誇外交手段之巧矣木幾而旅順膠州廣州灣相繼割讓國勢遂束縛而難以復振前車已覆來軫方適我謂政府方將引為殷鑑之不遑矣不謂默察今日外交之方鍼殆又將倚賴他人而乘間以攫其利益是何視他國之皆愚而我之獨智耶

日俄戰局將終政府為東三省事先商之於駐京各國公使以請其干預各公使拒之乃又請美總統以中國參與和議之言商於兩戰國在朝廷之意殆將藉外人之干預以使日本不能在滿洲伸張其權利而我可以不費一兵不折一矢安坐而得收回滿洲洵若是豈非計之獨工者耶不知各國之干預和議以抑制日本固亦容有之事惟自對馬海峽一戰之後各國政策咸已改變顧欲望其為我之故結怨於日本此必不可得之事也

吾之為是議者非必謂不當外交手段以收回滿洲也獨怪夫政府諸公不思振頓內政積儲實力以抵制外人而徒欲以市井狡獪之手段與彼擲生命糜錢財之戰勝國爭衡於壇坫之上以冀獨占勝利焉斯非天下之至愚者耶

乙巳外報
九月初一日 籌撥學費兩誌

烏程歸安二縣小學堂係借三賢祠合設一所常年經費則出諸二邑漕餘項下今因光緒三十年漕糧久已徵畢此款猶未給發以致堂用不濟茲已由紳具稟府署公請太守催提矣

又前者翁方伯通檄各州縣酌提徵糧之串票錢文撥充學堂經費當時程安等縣皆以票錢無餘學費尚裕稟請免提茲方伯已批示到府略謂該縣地方公款果能裕如無待另籌此等陋規自無庸議第前據府詳以經費支絀請將絲捐永遠截留經司局議以暫再展限三年此三年中應由府縣督紳安速另籌的款庶期經久稟謂該縣學堂經費尚未缺乏豈請展絲捐一案該縣絕無見聞抑謂學堂係地方之事該令可不過問耶仰府嚴飭查明據實稟覆云云不知各縣又將如何詳覆也

湖州府正堂李 札歸安縣知悉本年閏四月二十六日奉

藩憲寶 札開本年閏四月十四日奉

撫憲張 札開光緒三十二年閏四月初六日准

學部咨開會計司案呈查光緒三十一年十一月初三日奉

上諭孫家鼐等奏學務緊要請提科場款項一摺現在科舉停止專辦學堂京師為總匯之區需款尤鉅所有各省科場款項自應提充經費著各省督撫將關於科舉各項用款無論報部外銷儘數解京專備學務經費等因欽此業經行知各該省遵照在案茲將分別提留各款開列如下

一報部內銷之文武鄉會試經費應全解學部也查春秋兩闈經費主考則有路費等名目進士則有花幣牌坊等名目舉人則有花紅旗匾水腳車價長夫盤費程費賀儀卷資名目供應則有一甲進士歸第筵宴瓊林鹿鳴鷹揚等筵宴杯盤鋪墊小夫食米及刊送試錄工價送試卷盤費駝價書吏犒賞諸名目各省名目不同有無小異應令全行解部以備學務之用無論何省均應速解本年即值丙午鄉試之期向來款早備齊應令各省照每科銀數於本年六月以前解到一半下餘一半限十二月以前掃數解清自光緒三十三年起分年起解其向動支稅契者依上限起解其動支地丁耗羨者每年六月以前解四成十二月以前解四成下餘二成統限次年六月解清

一外銷之文武兩開經費及主考程儀等款出自釐金鹽務及雜款者應據實開報全解學部也查各省外銷或動釐金或動鹽務或動雜款向不報部其實比報部之款多至數倍眾論僉同自應切實查明報部勿令遺漏本年即值丙午應按每科實數於本年六月十二月各半解部自光緒三十三年起分年核算每年六月以前解半十二月底埽數解清

一府廳州縣攤捐之文武兩開經費應分別提留也查攤捐一項出自守令等官向不報部今科舉停止責令地方官辦理學堂考成既嚴必須加以體卹所有攤捐文武兩開經費應准以六成留辦本地學堂四成解部

一內銷外銷之學政考棚經費應分別辦理也查學政考棚經費有報部內銷者其款出自釐金鹽務應自本年起令其分三年起解每年六月解半十二月底解清至外銷考棚經費及州縣供應程儀等款應令和盤托出以數成解部以數成留為本省興學之用

一貢生坊儀應解部廩糧分別辦理也查直隸浙江等省已允將貢生坊儀解部各省自應照辦以歸一律自起年起照數起解至於廩生昔時出保童生奔走送考不無費用今考試停止廩生無事似近素餐且查政務處奏定章程拔貢照向額加倍優貢照向額加四倍廩生應出歲貢照額倍取生員令考取各衙門膳錄酌給津貼三年後分別獎敘又生員考職大省取一百名中省取七十名小省取五十

名一等以巡檢用二等以典史用所以體卹者已至今再格外體卹凡光緒三十一年所補廩生准其照舊支食廩糧自光三十二年正月起遇有捐官或選拔或出貢或考職或丁憂病故凡缺額未補者即將缺額之款扣出如間有已補者仍不給廩糧且廩糧向多中飽並不發給該生以致廩生雖有廩餼之名其實未領廩餼之款應請責撫轉飭查明令其和盤托出不追既往既係向不發給儘可據實聲明從本年起概行解部並將某縣定額名數若干每名應領若干或全不給領或除某某領若干外下餘若干名該解部若干年終截數造冊詳細聲敘於次年春將冊送部查核倘察看情形因廩生所領無多可以徑行停發毋庸俟缺出再扣以省扣缺造冊之繁即行聲復本部以便查核再坊儀廩糧向皆出自編征其解款期限本年應於六月以前解半下餘一半限十二月以前解清自光緒三十三年起每年六月以前解四成十二月以前解四成下餘二成限次年六月以前掃數解到本部

一賑給貧生之款應切實查明全行留辦本省師範或高等小學堂也查戶部則例內載直省在學生員有寒苦不能自贍者責成該教官確查造冊冊內分晰極貧次貧於學政按臨日投遞該學政據冊核實動支學租銀兩於三日內逐名面賑等語本部查此款名曰賑給有極貧次貧之分聞各省此項本生多不承領久成具文徒歸胥吏中飽應請責撫嚴查全行留辦本省師範或高等學堂之用仍將學田學租及賑給貧生各款報部備案

一齋夫膳夫工食應全行解部也查舊制因諸生就學而建齋舍因有齋舍而設齋夫因該生較優而給廩糧因給廩糧而設膳夫現在學校之制大異曩時既改從前齋學之制另設學堂則舊制之齋夫膳夫工食應自本年六月初一日起概行停止於本年十二月以前全行解部來年期限卽照廩糧一律起解

以上各條逐一分晰界限以明其應行解部之款統按庫平起解以歸一律除分咨戶禮二部外相應飛咨貴撫轉飭一體遵照辦理可也等因到院行司立即查照

部咨開列各條逐細查明議詳察奪等因奉此除由司分別核辦外合亟通飭札府立即轉飭所屬各縣一體遵辦分晰具報並由縣移會各儒學遵照毋違切切等因奉此合行轉飭札到該縣即便移學一體遵辦並分晰具報毋違切切特札

光緒三十二年閏四月初六日到院閏四月十四日到司閏四月二十
六日到府五月十一日到縣

敬稟者竊維今日時勢將欲變法自強洞開民智自以興學為先興學以籌款為急而其要尤在于擇人委任因事制宜使用款有涓滴歸公之實方今學界中固不乏熱心教育束脩自好之人而假興學為名因以自便私圖者亦所在皆是近聞各州縣紳董有指稟實興等款請領自開學堂者有指稟各州縣陋規提充學堂經費者類皆以公濟公之事自應查明的辦以為興學之資惟是人情叵測晚近尤甚第恐有寡廉嗜利者徒外文明而內多欲不知

憲恩之高厚不權事理之重輕一以時趨是尚技固工于揣摩且以本州縣之民發本州縣從前未發之覆迹更鄰于要挾

朝廷振興學校崇獎通儒原為造就人材起見而以一揣摩時趨要挾官長之劣董置其間于事何能有濟卑府區區之愚以為政貴清源將欲收化私為公之效必預杜假公濟私之門嗣後如有前項指稟情事該款

果堪提充擬請

憲臺
撫憲 發交學務處

憲處存儲至應如何撥用

憲臺自有權衡不得妄自請領將來學堂需款應稟由各府核明酌定需費之多寡稟請學務處

憲處將提款發交該府另選練達時事之人辦理學務 選廉明可靠之人用司會計如是則事有歸宿之區而易於考察人有分任之責而不至侵漁學堂弊端似可賴以釐剔 卑府一知半解何補
高深然管見所及不敢不以上聞所有稟請嚴杜學堂流弊之處是否有當合肅稟陳仰祈

大人察核訓示並請俯賜

飭下學務處核示通飭遵辦以裨教育恭請

鈞安

府憲李 札歸安縣知悉本年五月初三日准

杭州府世 移開照得科舉奉停廣開學堂惟經費無出往往有請將地方公款撥入學堂或指出各州縣陋規稟請提充學費是固熱心教育者之所為而假名興學者亦因此便其私圖售其要挾敝府有鑒於此亟應預防流弊現已據實稟明嗣後如有前項指稟情事其款果堪提充擬請

撫憲飭查明確仍發交

學務處憲存儲將來學堂需款須稟由各府核明數目稟請飭發另選紳董經理以杜流弊除俟奉到各憲批示再行移知外擬合抄稟移請查照希即飭屬一體知照等因准此合亟抄粘轉飭札到該縣即便一體知照特札 光緒三十二年六月初九日發六月十二日到縣

計粘抄

詳復前請留存一半考費因儘數撥充本地學堂尚慮不足勢難移作別用乞賜轉請免提由

武康縣為詳復事本年四月二十五日奉

憲臺札開轉奉

提學憲批辦理湖郡中學堂監督沈毓麟等稟議辦湖州府師範學堂擬籌款請示由奉批培儲教員自以速辦師範為第一要義據稟改右文館為校舍易無用為有用該紳等運籌周密嘉慰良深所請留縣考試經費撥充師範常年經費應由府縣會同七屬士紳通盤籌畫如果取情悉協自應照准至絲包善後捐能否由府撥用應候移請

釐餉局核奪仰湖州府轉飭知照并會同沈張二紳妥籌核辦以觀厥成仍候

撫憲暨藩司批示稟抄發等因奉此查此案前准

沈張二紳移業已由府轉詳並據程安二縣會詳到府又經批示各在案茲奉前因除分飭外札即會同士紳妥籌稟復核奪等因奉此卑職隨即邀集諸紳妥行籌議咸以郡城設立師範學堂係為造就教員誠為當務之急凡在同屬士庶莫不樂於贊成祇以武邑僻處山陬素稱瘠苦前奉飭立學堂因經費無出係將舊有前溪書院權行改設除將書院原有一切膏火等項悉數移抵并由卑職每年捐廉二百元暨於每忙串票內提錢八十千文因不敷尚鉅復於膏捐項下稟請每年提撥錢五百千文藉以因陋就